

沅  
湘  
耆  
舊  
集

沅湘耆舊集卷第一百五

新化鄧顯鶴湘臯編輯

長沙毛國翰青垣校訂

張華亭世法 三十三首

世法字平度號鶴泉湘潭人石園大令九鍵子乾隆癸未進士授房山知縣病歸起知寧夏縣以父艱去服闋再補華亭所至振刷吏胥無敢欺嘗語人曰甯從吏胥罵無懼鬼神誅其風概如此有瞻麓堂集六卷詩才力險峻亦復平正與專事鉤棘者有別

告朝那湫廟

朝邛古秦縣西北有靈湫惠文使詛楚告神於陰幽是時  
楚方強三閭多賢謀熊相昏不用自陷身繫囚非神禱其  
魄曷至罹慘憂湫神爲巫咸此義或愆尤池黝深莫極旱  
勞無沈浮吾聞神所棲理宜告爰休土人愆雨澤乃用致  
禱求精誠嚴請命載拜瞻雲旂願神沛恩膏惠茲民田疇  
軒龍及文鳳百祀還千秋

華邑泂水辨

小水入大水雨水趨合流於名皆曰泂是泂所稱由吾觀  
禹貢中專通各不作會過尊渭洛彼義無旁求獨茲稱泂  
水涇屬渭兼收淵源溯南北雨儀山別漚對峙豁重門東  
匯赴平疇三山並九峪其勢始宏適到涇除垢穢復見清

山濶分台不相蒙有容德乃優漱滌與牢籠世莫爭嬈儔

美哉觀斯水以治古儀州

自注雨儀兩山誌載南北對峙

寓平涼郡東郭侵晨聞有書聲朗然可愛知此地文

教尙存亦守土者作興之化也

更漏聽未終書聲徹東壁朗朗玉琬琤傾耳叶韶律山泉  
淅淅越禽鳥嘒圓密得與靜器離條然忘城邑伊余累塵  
障冠巾慵沐櫛積案紛排山殘編散一室偶然遊郊藪百  
里窮佔嚙絃歌久廢缺瘖啞中奇疾何人變鵲音勸導慙  
無術爲愛鄭國衣莫叱齊門瑟居邦有賢仁光輝在蓬華  
布穀鳥至

鴻鈞根一氣橐籥日鼓吹空冥杳無端節候倏而至清風

遍隴頭一鳥桑閒咲借問此何時春農催樹藝及畊理常  
業力作供王稅秉耒分既習督促復何事彼非有職司出  
入勞寤寐穀穀陂田閒筋力不得遂南疇方畝種東畝已  
吐穗百穀量歲功三時覘政治誰其牧斯民提撕重所寄  
戴勝卽布穀鳥歐詩所云戴勝穀穀催春耕者是也  
或又云係織紵之鳥禮記月令戴勝降於桑乃言蠶  
事似與催耕無涉故補此作

有鳥天上來岸然首高幘猗猗桑正繁清陰蔭廣陌鳥飛  
啄桑葢率子相鳴嗌我聞鳥好儀旭日羽毛澤彼職司織  
紵其事在巾幘文章觀黼黻筐篚出幣帛婦功亦已勤蠶  
繭傲朝夕西人慣燭皮遂至女手戢微行何爰求誰復勞

桑摘機杼無所用，縑素不能尺。烏來空踟躕，生意日已窄。  
視彼牆下桑，淒涼五畝宅。

祭厲

北邙山前高宰木，石上麒麟噤烏喙。轉眼榮華一旦空，鼎  
烹祿養何太速。馬醫夏畦鬼雖貧，子戴孫挑滿郊谷。但令  
死後邱壠高，不憾生前年代促。君不見長幡挂樹紙錢吹，  
野竈生烟麥飯熟。

山城卽事戲簡幕中檢用朱竹垞集中江字韻

老馬未能脫重銜，日食豆稍懸短楮。我今衰晚纔一飽，臥  
聽更鼓催逢逢。清晨起作囚山賦，仰見煙霧堆崕峴。鵲  
鳴樹城鑰，啟朝暾遲滯來寒窗。平生夢遊在吳越，仕宦每

不到名邦有口對人常囁嚅那更往復翻瀾江忽逢簷前  
索酬唱好鳥聞關聲連雙一月但作十日飲太常齋免牽  
肥羜都盧景學邯鄲步妙舞角戲尋胡撞陽春難露清極  
發有似金玉鳴春擬酒兵塵屯愁陣破騷鬼出入睡魔降  
其茲文墨擗刀筆豈必筆楚驚懸懸昨聞畚田告收穫  
其又欲事耕耨入廟伯神欣報賽肩頭醕肺爭擔扛而我  
亦憶鄉風好碧波菱花浮輕艘羊裘深入富春渚釣臺千  
古詩高擅何爲塵書排案積寒煙四壁燒殘缸門前誰更  
施行馬差對衙皂紛持幢且將佳句供遲暮願伴楚客吟  
萬荏相看秋夜月未落河漢清淺橫天杠

宿長流水

長流流不斷砂磧馬蹏窮草入春猶沒山經雨亦童求音  
無鳥到問徑罕人同薄暮停車處荒煙一縷中

題徐容軒彈琴小照兼贈遠官綬來之行

先生真吏隱託興在枯桐獨嘯青天月翛然太古風此行  
將萬里愁鬢已雙蓬欲續知音者高懷誰與同

重九夜久雨枕上卜將晴

擁被欲無寐沈疴漸覺輕鐸收殘雨盡雞唱曉風清已負  
登高約還宜看菊情啁嘈問簷鵲天意得毋晴

聞笛

正是無聊際誰將一笛橫關山今夜月梅柳故園情冷雁  
猶遲塞愁雲未啟城隴流更無盡空作斷腸聲



秋館

秋色滿平蕪驚心物候殊  
草閒瘠蟋蟀原上急  
鷓鴣塞通星光冷城荒劍氣孤  
夜來虛館夢常憶昔年無

華邑官齋卽事

山城鳥集自啞啞到午無人且放衙  
冉冉三年將白首蕭蕭九日又黃花  
文章老去思焚草風雨愁時夢到家  
料得兒曹書一紙破余岑寂是天涯

此地暮春感事

孤負春光九十中桃花原不嫁東風  
平山失勢雲難住亂水迷源路未通  
帶日歸鴉何草草避人野鹿亦怱怱  
無端並逐塵甍起茗椀詩瓢事又空

此邦

聞道此邦多嘯咷背人城郭向山腰  
雲黃野路俛尋虎月黑孤村鬼叫鴞  
老去英雄還閉閣閑來生事在歸樵  
詩成莫問高軒過但有禪情破寂寥

公庭

槐陰清映兩三行門逕全深護曲廊  
偶爲繡經來鹿女時從課雨見鳩郎  
刑矜豈示蒲鞭辱役免何謠乳穴祥  
好是春郊秧馬樂兒童騎上長官堂

晚霽

雨洗清秋澹遠空幽懷更在晚晴中  
蔚藍欲寫皆真本絕壁何聲不古風  
世事有無看覆鹿人生來去信征鴻  
亦知

薄宦如浮梗且喜山城興未同

騰夫和章有莫拌詩骨瘦於藤之句喜而致覆因以

自戒

試看蒼藤瘦欲穿對牆何更聳吟肩五千卷有多文字三  
萬日能幾歲年奇可驚人空復爾險曾泣鬼亦徒然祇今  
未死尋常事莫說他時買值錢

平涼旅夜漫成

最是秋天不肯明蕭蕭白髮已潛生人閒日豈回三舍枕  
上愁將到六更截業崆峒誰訪道潺湲隴水舊聞聲自嗟  
身事俱遲暮何復羈棲臥古城

余已解組乞歸杰兒又復千里遠來旅寓棲遲意甚

蕭索作此示慰

年少因何有遠遊秦關隴水復淹留書生不勝百夫長公  
子誰輕萬戶侯破產今朝翻灑落罷官諸事且閑休汝曹  
但看吾衰老莫羨輕肥得自由

海峯因余有索水仙詩乃更以詩見拒余謂當此獨  
處之際正宜畱伴清幽也復依韻酬之

空將素質貯深春覲面還疑隔數塵人去漢臯誰解語曲  
終江上更傷神自注君斷絃已及一週矣榛苓不寄西方美繁藻常依  
南淵濱一種芳魂託明月思君祇合縞綦貧

更齋有迴恩志喜詩以此索和爲依韻勞之

珍重時清未死身風霜雖古意常新解驂自免越石父深

谷還高鄭子真詩卷拋殘千載後釣竿投在五湖濱祇今  
伏櫪甘從老豈作長鳴更向人

### 三窟

衣褐終年髮未髡中山占籍舊文孫廣寒久去無仙術陶  
復還經有廬原肯爲田君謀下薛免教公子出東門菟裘  
何日身將老贏得輕價祇自存

### 擬於秋杪南行辭示諸子

嘶嘶草蟲牀下鳴去官張翰又思征秦山到處難留客隴  
太從來只送行咍嚕老年判百澹破除歸袖喜雙清退身  
何必五湖好莫學鵬夷漫改名

### 歸計

手版頻難見督郵經營尙有舊菟裘閑來免問塞翁馬老  
去甘爲孺子牛楚國書歸輕衣錦玉門生度勝封侯行當  
乞買鄰西地得種園蔬即便休

得歸憶舊

踏遍湖山戀做廬倦歸吾亦愧籊籊刁騷鬢已斑雙頰拓  
落牙猶折半車厭病喜看新月吐懷人驚見曉星疎十年  
聚散須與事祇覺豪情不似初

歸途戲作遙寄內一粲

瞻麓堂開雲在山懸知相晤定驚顏浪傳海上坡公死眞  
見羌村杜老還休憶昔年恩怨語祇疑今日夢魂閒詩成  
遙發妻孥笑歸去情懷嬾更頑

襄陽喜晤伯謙郝大兄

放懷天地酒盈樽，僮僕喧呼客到門。  
山簡接離餘興在，襄陽耆舊幾人存。  
慈雲護屋烏趨母，霽雪添巢鶴引孫。  
他日幅巾容再拜，登堂輸我與公尊。

西涼曲

七月西風撲西涼，清晨韋幙滿飛霜。  
沙場白草無人割，但見蕃兒早放羊。

旅次吟

邊城五月火山焚，一望黃風捲白雲。  
日暮賀蘭歸獵騎，不知誰是故將軍。

不羨千頭種沐奴，惟將一紙抵明珠。  
從茲買棹湘江去，勝

書直隄泛五湖

歸興

小年常有氣如虹搔首青天興不窮今日名山翻對面竟  
無長劍倚崆峒

黃河天際浪如雷華嶽峯頭蓮作臺每惜奚囊收不去空  
教走馬向西來

周建水恭先三十七首

恭先字平山一字素芳新化人乾隆丙戌進士官  
雲南建水知縣以事謫戍伊犁歸後布衣躬耕絕  
跡不入城市嘗暑月耘於野偶憩柳陰下時值歲  
試有罷試事歸者就詢試題或易其爲野老也挪



掄之亦不較也先生性恬澹胸次高雅爲當道所  
重畢尙書沅總督湖廣時曾亟稱於某觀察延爲  
子師會寶慶方郡試觀察因屬先生兩子於郡守  
先生聞之遂不令其子赴試其冷峭如此幼奇慧  
九齡附縣學籍有神童之目宰建水甫半載卽罷  
重譴非其罪也與同邑吳樗蘭柴以詩交最篤蘭  
翁專主才氣以雄博勝先生斂才鍊氣醞釀深厚  
格律渾成雖遭意外貶斥久處塞外而出語和平  
溫厚無激烈譙殺之音可以知所養矣

櫛髮行

容余不淑顛蹶已久自東徂西貽累皓首昔在離居茂臨

子丑遊歷遠陸維申及西匪曰匪旬曷云无咎顧此髮膚  
眷言全受感悟遂晚事往心微莫昧我目莫拊我髀朝隨  
塵軌暮侶羈雌蟾光屢逐烏影重追南山有薦北山有著  
余髮種種余焉能爲有金其飽有象其搖豈曰爬梳庶理  
塵翳昔在盛年恥聞屑髭如彼茂松甯合晚翠如彼幽蘭  
雪霜是悴藐藐人生飄飄如寄毋跋我履毋正我冠悠悠  
水滸淠淠雲端維鯁與鯁維鳳與鸞以游以泳其往其還  
何以銷憂惟有閉關何以相思努力加餐

雪夜有懷

幕霧障遙岑橫颭颭空碧闔戶鎖天倪括囊鉗地脈履霜  
陰始疑呵凍氣相迫奄忽集如霰迴旋舞增劇惺忪龍女

淚縹渺飛瓊鬪誰爲碎剪刀漂此殘魂魄飛步灑簾櫳遺蹤侵荒席乘元恣浩蕩委隊成堆積厯險冒崔嵬徑斜穿逼窄檐溜綴夢撩冰澌潑陂澤鏤續奇紛錯融冶鑄罅隙鵝肪染翠綠烏卵迷朝白雷電早收威魚龍猥屏跡壁壘失堪輿虹洞平潮汐地迴擴遐荒圖窮侈版籍蒲海絕三邊靈山妥千尺峻危馳折坂斥鹵連沙磧原野轉焦遼村屯杳蕭索野農占來稔逐客傷逮謫駑馬尙銜鐵樓禽方墮翻曉隨雄雉飛暮侶寒蟬咽土屋藉存身敝裘姑掩骼鈴閣擁幃帷軍門森劍戟羽書日沈傳公譙時暖席閒筵集僚幕舉舂相夷懌積照疑勾闌浮光映銜壁絲竹發清響羅綺懸高格賞茲肌骨瘦姘彼華容驀罷罷舞競吹婀娜

娜顏茲赫深夜幾回聞沈憂豈堪釋祗添羌管愁詎等旗  
亭畫人事那堪憶世途安可擇前修夙云暮塵累久思片  
落落五湖帆縷縷千巖柵歛乃聽漁歌飄飄訪仙宅藉草  
覘星文飲露貪雲液車馬不聞喧柳雪何煩噴夢想結千  
場投軀只一擲悲哉渡海帆窈矣尋山屐孤負紫芝心潦  
倒黃牛草慾往動槳胸飲淚恒乖隔君子道何尤鮮民生  
枉惜對榻語誰共明燈影虛隻戍鼓雜颼颼邊笳助暗啞  
晉齣苦侏離羶暈強燔炙酒醑摧心肝煤燠創瘟疫緬彼  
玉門關邈然藐姑射恍悵感神明悽愴動金石何以寫我  
懷願借繞朝策

短歌行贈張湘樓前輩曹雲濶司馬

雪山有大牛力如龍與象燥雪無纖垢煙雲足供養我夢  
乘之遊元關時蕩蕩路逢寒山子問言執其鞅大笑呼蒼  
天應貞跡可仰臨崖俯絕域方圖指諸掌穴穿螻蟻封雲  
罅珊瑚網昔時海上人英風貫霄壤碑碣幾畱存勛名付  
榛莽感此長歎息覺來神惚恍我家本南國雲水相泱泱  
回首憶兒童釣遊何倜儻浪跡淪大荒起坐悲罔兩志沮  
形復穢有愧畱神像况逢寒氣驕出門迷所嚮卓哉兩夫  
子精神何壯往揮戈邁魯陽探珠窮象罔薈蕞矢無遺數  
數技方癢胡爲同此軀一弱一偏強杯酒謝煩懷齋室恣  
存想矯首望衡廬欲搏扶搖上君還相訪來爲挾青龍杖

喜雨獨酌

北風天上來飛雨隨塵潑列缺走牆藩雷車徒轟輻火繖  
卻炎官神潢收女魃窗戶有餘清眉眼頓軒豁平生頗嗜  
酒興被囂氛奪人虛竹篠飲多病茂陵渴陶然午夢醒聽  
彼簷溜活雖無瓜與李朋賞共喧聒樽中喜不空蘭英猶  
可掇一酌聊自勉三杯神愈脫悅然中聖人現我優曇鉢  
雨過酒微醺浩歌響禪闕

望博克達山遣懷有作

自注山  
卽雪山

我隨雪山行蒼茫鬱無已終春徂始秋延袤幾萬里弛節  
望崦嵫倉皇訖居止穹廬伊枕宿壘土築基址四野莽蕭  
索寒峯當戶起巖巖插天關屹屹聯雪壘晶光蕩紅輪嚴  
威森獬廌白帝曬裳衣玉妃陳縞綺霜女弄鬢髻秋龍蟠

誦詭紅霓披幘嶢朝雨冪青紫殷雷鼓長風霏霰鳴千里  
感栗疑堅城燔燭無殘藥聞之此邦人積歲不可紀芒屨  
罕登陟柴望絕裡祀靈氣有莫秘雄藩拓邊鄙煌煌

天語昭肇稱依泰時培塿千萬峯穹然揭隆巋遂令勒燕  
然掃地除壇壝霽雲妥仙關洪渠瀉靈水石澗走飛泉寫  
鹵澄清澤萬仞聳無崖兩城角且倚三十六國地俯首如  
奴婢早歲慕衡廬結契尋圭旨五葢發遊蒙騰虛跨綠駟  
飛錫躡應貞撫頂摩法喜落落憩松蔭淋淋敲石髓掘閭  
惡蟬蛸棄之如敝屣此志未及就冥幸遭良趾八月廣陵  
濤橫波盪菰米嚴冬氣逼抑獐飈摧梗杞昨者過嵩華遂  
歷秦隴坻名山高士多幽巖何鬱美綿邈訪崆峒長臨廣

成子搗來弓影虛墮翮將安委疏屬感荒唐焦原懲畏蕘  
敢希迦葉飯漱池勞帝指庶得浣棄衣寶樹低可倚法雲  
陰大荒慧日照羅靡高岸倘可登五行當一駛

遊仙

少華不盡太華連山椒雲接崑崙顛萬里一息落青鳥金  
泥玉簡開瓊筵瑤池一宴三千年搖光剡酒蟠桃鮮東方  
小兒空懊惱墮落人寰稱地仙羲和已入蟾蜍續綵女如  
花歡未足沈香甲煎飛談光化作陽和調玉燭七襄雲錦  
閒天孫此日北宮邀上元天桴不槌鼓聲寂支機石上畱  
霓痕瑤池水碧瑤觥歇斑鱗輦上絲絲髮雙成萼綠悄無  
言倭墮雲鬟弄煙月三十六洞連層城帝閭啟鐫聲噲呖



凌風一展翀天翼手把芙蓉朝太清

辛丑三月將發往烏魯木齊畱別獄中前保山王明

府錫

冀北空羣馬荆南一羽毛伏檻思千里長鳴震九臯天長  
地濶兩無極各攬皇天問消息霜蹴蹴隴雲間修趾洪  
誇閭風側豈知牢落風塵裏敝帷慘澹虛弓起君今逮繫  
已七年我竄新疆萬餘里君悲兩鬢色垂絲我亦喉嚨望  
眼眵相逢各有傷心事洗日回天知誰是雲南風氣更淒  
緊自冬小雪徂春盡飲冰嚼雪爲誰來茗酌欹杯終風景  
皇仁遠覆直如天花落重生月缺圓此日浮雲遮滿  
眼那知不有清風旋江南喜聽音書好我亦離巢盼仙侶

伸眉把臂會有時努力加餐莫令老

辛丑五日滇城讌集兼懷舊遊感成長句

四載之內兩端陽綠蒲黃黍澆同鄉西南萬里止絕塞魂  
招不到楚天長人生最苦遠離別叵羅不散真憂傷主客  
浮杯眼空白有酒盈瓶各盡觴吹我桓伊笛踞我管甯牀  
一曲折楊柳滂沱淚滿裳公冶南山悲孽鳥鄒陽五月飛  
秋霜煙花落日不相待年來年去朱顏改索米摧頽憶舊  
遊金魚幾向當壚解五噫處士出都門昨昔相知幾人在  
卻憶中郎覓虎賁乘興還從捉老兵龍舟不見瀟湘遠誰  
家鼙鼓空徇疆四海長風捲地來昆明水沸魚龍哀圓通  
寺頂最高處欄花遠映荷花開旗旄夾道紛指點玉壺金

管行相催東門笑竊歎黃犬安國空勞病死灰匡廬九派  
潯陽水衡山一帶青煙裏那將青袖拂雲去平遠江天在  
衣底坐中起舞揚清歌泣楚囚今可奈何金樽綠螳判微  
醺興來哀樂爲誰多酒無盡意無極義和弭節知我心六  
龍倒掛崦嵫側

### 登紅山

昔者祝融肆征戰彤幢紫霧奔如電其工怒走不周山維  
傾柱折乾坤變茲地豈其營壘與劫火沈灰徧荒甸五月  
草木酷不生千巖萬壑如燔煉紅山兀矗兩城間三十六  
國如繚圍西盡烏弋瞰日入茫茫紫微燠天闕溼瀟晚渡  
驚飈起振野橫沙斷流水蕭蕭古牧雜新屯笳聲慘澹悲

犀兕分髣屬國勦螟螣驃騎輕車軼世奇鑄功勒石紀陳  
迹碑版摩挲屬阿誰龍堆棧鬱英風沒古來名將俱消歇  
長風吹渡隴西頭只今惟有關山月

湘樓先生以酒餉雲瀾司馬司馬復以詩招余因次  
其韻酬之

湘樓白髮賁如皤談元縱酒如懸河近得雲瀾紫塞客草  
創十笏爲行窠竟談終夕靡辭久興酣呼取紅文螺勸牛  
之肚茱萸筍新韭薑醢配子鵝主人高興及旁客遂令滿  
座朱顏酡搜竒探韻競咀嚼醴醢在口如鹹醢奮衣拂筆  
起高坐嗟我小生何惜搓九州蹤跡餘幾許平生慷慨徒  
悲歌謫仙放蕩頗自若少陵坦率誰能訶幕天席地且快

意酒兵自可伏百魔昨者黃封上 玉陛片簡或可延  
恩波漁戲只應追漫與吏隱何緣謝蠃坡感君折簡復相  
召上客攜君屢見過良辰佳會豈常有諷君嘉韻勤吟哦  
風流王阮雙絕迹我愧公榮將奈何壁間勝事可刊刻幸  
煩鬼物爲搗呵洞庭春色丁在眼行將去此乘黿鼉

庭州東城巡政弟士咸以生魚見贈賦長句答之

庭州二月冰初泮策策堂堂魚可貫忽聞使者來叩門遺  
我數鱗長尺半頗稱佳酥白妾鮮似從丙穴仇池斷吾宗  
單父樂朋賓率簡鮐鰯開宴衍春濤淼淼劃分城偶憶羈  
孤供薄爨攜來瀉水注瓶中水荇交橫潛影亂霜刀袖拂  
不忍揮愛此噉啜資飽玩饗人縷切爛銀絲雪花紅肌生

兩腕鄰家酒熟甕初開佐我流匙香滿案僕本煙波一釣徒久慣沉竿兼續緱蒙莊自解豪梁樂次山永結笭簪笠簷蓑袂幾時還使余心在江湖畔

春晚出遊寄南中諸友

三月已盡楊花開微風拂近短梢來爭枝啁雀不忍去行人繞樹心悠哉沉吟淥水遊春曲載歌樂府臨高臺杳杳江干黃竹子蕭蕭隴外白龍堆龍堆隱伏征夷蹟蒼茫遠塞長城脈義陽博望委塵灰安遠長羅空鳥飛只今柳眼對誰青惟有山髭虛點白山髭點白幾經秋年來年去任淹留白草原中看走馬黃花戍裏聽鳴鳩萬里關山雙蠟屐半牀風雨一瓊裘含淒只自憐春晚乘興還爲賦遠遊

遠遊汗漫恣行樂相思遠道然疑作故人有類縱壑魚浮  
生恍似驚弦鶴顧影長懷歸燕詞何時共把鸕鷀杓解衣  
蘿薜挂有期與君同副名山約

感秋

風日淒淒秋氣高奔走墮地金神勞荷青芷白畱不得嚴  
晨慘澹霜飛袍城頭日暮羌聲起笳鼓轟轟振邊鄙但聞  
野鳥叫雕闌不見潛魚起清水潏潏銀潢愁一派靈車已  
度星妃在停梭中夜悄誰聞悵啟湘簾魂欲碎桂光迢遞  
幾回圓浪乘仙舸憶嬋娟天宮咫尺不相問縱舞霓裳亦  
可憐山髭瘦老芳華歇洞冷泉深鎖幽咽一聲孤鶴倚雲  
空遺響悲風心斷絕

八月雜詩三首

八月清光迴登高覽薊邱島開滄海日天接太行秋  
畫省風雲合煙城草樹浮冥冥千里外鷁鷺起中洲

漠漠西風起雙雙海燕飛小堂春夢遠秋社旅魂歸  
北里朝鳴玉南隣夜搗衣迢迢星漢女軋軋未停機

太白當西轉高樓獨坐看天低螢火亂秋老角聲寒  
子夜歌初發葡萄酒未乾功名感意氣長劍倚雲端

靈寶道中

西望咸陽去霜侵兩鬢斑曉雲分太華落月下函關  
九影通方軌雞聲度遠山鄉園一回首乘傳幾時還

西征



出塞經三月圓規第五弦沙平疑泛海星滿欲行天一輩  
墨摩影橫槎漢使年蒼茫何所似中夜不成眠

地窩鋪晚歸卽事

景短風逾厲天空塞迴平戍樓煙際出飛騎雪中行路抱  
西山轉城連北斗傾戴星緣底事總轡聽殘更

次雲瀾塞垣玩月

朗咏人千里嬋娟思不窮樹鴉棲冷露邊馬動秋風古道  
盤迴出寒山遠近空莫教楊柳岸重唱大江東

早起

樹密雞棲穩簷深燕語微近衙鳴小鼓遠岫上朝暉萬里  
青萍劍三年白板扉栗薪瓜已熟或者賦東歸

野水

野水通沙漠溪行費溯洄氣清蒲海近濤放雪山來攬佩  
懷芳草漂流歎腐葭河梁千載思日暮使人哀

聞笳

笳聲起天末壯士獨登臺寒眺遠山動悲呼暝色來變衰  
搖草樹號令撼風雷不是聞羌笛橫吹阿鞬迴

和吳蘭柴過常山作

太行東下俯蒼冥正定城高壓井陘萬里河山歸睥睨百  
年烽火靜郊垌遠帆落照滹沱水匹馬秋風麥飯亭欲訪  
居人尋舊事酒帘垂處柳青青

磁州道中

方洲先生集 卷第一 下  
渺渺長征歷幾邱，黃沙飛盡眼初留。  
邯鄲北走燕臺道，滹淦東臨滹下流。  
紅稻雨餘秋色遠，碧荷風動晚香浮。  
雄圖往事知多少，沃野應輸第一州。

西湖夜泊

蘆荻洲前喚奈何，五年歸夢客愁多。  
黃陵古廟深秋雨，青草重湖入夜波。  
帝子有情悲落木，天吳何處吼鹽壩。  
停船倚棹誰相問，羨爾漁翁泛綠莎。

雨別同寅諸君子

行行策蹇出荒陬，一顧滇城涕暗流。  
雙塔寺前深夜雨，五華山外暮雲秋。  
休官強作同僚語，出塞還爲萬里遊。  
置酒羣公高會日，莫教檀板唱涼州。

五日

五清明後五端陽昔日都門泛羽觴豈謂隻身辭鳳闕  
翩然萬里出龍荒驚心隴雁皆愁侶回首燕山是故鄉  
訪大通橋畔客重招把盞話離腸

晚秋

長風吹墮隴西頭五載戎軒役未休幾度角聲悲永夜無  
邊月影動高秋城臨象緯搖天闕海傍雲山擁戍樓慷慨  
少陵歌出塞定誰投筆取封侯

過友人舊居

不才自合此偷閒身事依違古戍間  
蜃氣遠通蒲類海雪峯高枕鐵門關  
論交已負三生約知我誰開五載顏  
會面

偶然仍別去煙蘿何許其君還

### 早發山丹

海氣青青驃騎營燕支山下曉煙生  
平番舊築三邊戍飲馬今開萬里城  
紫塞四周埋土屋黃羊滿地索枯莖  
車輪日轉情何極翹首甘西遞遠征

### 咸陽懷古次壁上韻

踐華因河舊帝都銷兵已盡復何虞  
自從驛使逢山鬼遂許羣雄問獨夫  
三戶未曾興項籍長城先爲寢扶蘇  
素車肉袒降王後銀海金嶺事有無

### 五日八道溝中

自述土人呼爲昌水

雪山舊壁三邊戍昌水行逢五日流  
白酒青蒲何處是不

堪回首望甘州

庭州詞

賜璽羣稱天可汗當年四鎮等虬螭可憐百戰黃沙地過  
眼全無片石刊

身輕絕域取通侯大漠風高海水秋羌笛曾聞怨楊柳唐  
人只解唱涼州

花門遺種俗如何鹵莽連山結構多捫馬帳中銷酪母鳴  
鞭磧上舞蠻韉

羣幕瓊裘劇可誇牛羊滿地卽生涯神仙鎮上無春草茂  
巴營邊有暮鴉

沈湘耆舊集卷第一百五終

沅湖耆舊集卷一百六

新化鄧顯鶴湘臯編輯

長沙毛國翰青垣校訂

吳新泰思樹

七首

思樹字尙松一字建軒新化人乾隆辛卯進士官  
岳州府教授山東新泰縣知縣先生生有異稟少  
時其世父授以習靜法枯坐如禪律久之於書過  
目不忘經史外泛衍百家傳記旁及道藏佛經無  
不流覽尤精天官星算推步之法當乾隆中大興  
朱學士筠以古學倡天下門下多淹博士先生會  
試實出其門獨退然不自有學士陰察之乃自以



爲不及然世之知者尠矣性迂緩官新泰甫三月  
星吏議賠累鉅萬窮老以終著作亦散佚不可問  
矣余所見先生上學士書知其會著有通史千卷  
其書卷帙已成將求學士上諸朝未果今吾邑  
人乃不知有此書其他更無論矣矢詩不多偶存  
一二亦深厚無淺語

登維山

南陸和薰轉炎曦熾懸巘黍蕤被鳥徑蟠絲習人面懷陰  
息密翳尋響消華炫言攜塵外衣肅此空中并俯立驚雷  
殷前望知雲變遙碧望沈浮奔青屹轉輾高文不可分  
野倏將邇蚬蚪鬱深寺藿靡徑寒院遠景足嬉素幽結藟

清宴

嶽麓懷古

紫陽之山何犖嶭萬里扶搖拂氛濁雲氣彌連鹿洞深雨  
聲夜向瀟湘落湖南清絕古潭州漢水下江相匯流近汴  
濂溪遠伊洛溯洄共作湘中浮臺懸絕巘赫曦起亭橫半  
嶺高明峙渡口秋蘭帶水青洲頭翠橘含煙紫滿院竝歌  
詠洙泗摩挲禹碑註綠字昔書監廟早徵書後來秘閣胡  
垂翅志完夜火寺僧迎豈如使節軫車行至今曲渚飛花  
裏猶有當年鼓棹情

資江早發過茱萸灘卽事

邵州城下東山址邵江流入都梁水曉舟縱棹入寒空浮

沅湘耆舊集卷第一百六

二

蒲裊荻天光裏沿流興發歌叩舷瀑泉捲雪飛黃肩兩亭  
犖嶭如虎臥或如欲搏孤羆跼中流惡石更楚楚跳珠激  
雪折柔腸眴目迴驚濤欲豎安危但信天公主乘舫擊太  
透重灣轉索振舵如等閒藤龍竅菓甯天面薛虎裊離漏  
日顏百里懸端束山麓更有崖門撐洞曲山隘猶觀峽角  
青依平始愛皺紋絲布帆盡日人悄悄野樹潏泐漁艇小  
一樓藍拖古霧深千山翠疊春曦早溪村三四覆林窅石  
罅青帘颺樹杪舟子搖槳發棹歌繫蓬楊柳更如何

遊文斤山

典午東西日飛鳥仙令高浮邱還左挹林慮正憚逃慙尋  
王道節不佩呂虔刀北望蘇門枉鶯音一嘯豪

底事清談盛喧爭第一流黃花偏傲晚紅葉已驚秋石榻  
搯龜足崖門胷虎頭許支空論難還向此中求

古道來冬杪閑亭倚夕陽林空孤下鶴石立欲成羊霧洞  
素人避禮祠晉代荒何時稅塵駕幽息白雲鄉

羽客吾宗在邀將醉玉酬水沈眞篤檣煙起澹芭菰抱月  
生雙翼浮天入一壺丁丁聞落子豈有爛柯孤

吳編修俊升十五首

俊升字宅三號芷泉沅江人乾隆辛卯進士改庶  
吉士授編修芷泉好學深思淹貫經史在詞垣未  
久卒於官未竟所學詩和平樂易不事鉤棘自饒

風格

# 明山

蕭騷夜山後清氣相盪磨孤峯起平野百里無坡陀澄江  
浸其趾村落散其阿上有前明寺微茫鐘梵過荒徑飛簷  
荻短牆延薛蘿好風一同薄漁樵時和歌愧彼市廛輟羨  
茲安樂窩新醕足酬酢僻壤共婆娑岡岫豈在高回首已  
嗟峨誓尋衡嶽麓更棹洞庭波

## 遊景星亭

蜿蜿蜒蜒洞庭西慶雲山下晚雲低岡勢欲連隴忽斷青  
巖白矜覓幽蹊逶迤漸度篴簫谷驚地梵宮拓心目蒼松  
百尺吼虬龍古壁千年穴蝙蝠當時象教衍南能色界莊  
嚴護一鐙劫後已無多寶塔客來只見六朝僧僧言靜境

開前代兵燹滄桑真可慨虎豹周遭人迹稀頭陀去住辨  
香在曾聞唐虞之世歌景星此刹偶爾得嘉名木魚夜冷  
敲殘夢貝葉春深記太平神仙每降七仙洞枯碁幾局琴  
三弄樵柯欲爛響寒泉日月相催老賓送只今暮雨復晨  
風人閒久絕地天通我來聊爲訪花鳥疏鐘一聲萬壑紅

### 望洞庭

洞庭遙入望千里浪翻銀渺渺巴陵道沈沈夢澤春江山  
雄霸國草木怨詞人挂席斜陽外乘風欲問津

### 赤山漁家

一片閒雲裏悠然樂遁棲漁爭流上下家接塢東西落日  
依沙鷺清風趁竹雞桃花三月浪欲訪武陵溪

通慧寺

蒼涼平野望招提岸蓼汀鳧水四圍石徑行來紅葉滿鐘  
聲斷處白雲飛廚寒芋火僧慵慣戶罾蛛絲客到稀賸有  
一灣明月在殷勤相逐送余歸

鼎城詠懷

玉帶津通秀水流一方文物景前修寓賢高閣客談道歸  
老小橋人倦遊珠履不來黃歇墓木奴猶對李衡洲數千  
年過如彈指遺事茫茫問白頭

和款浦席閒贈尹莘田元韻

一座芳談不礙喧宵深徙倚月臨軒雲龍上下追韓孟風  
雅騰驤接李溫杜曲秋高塵外領湖南草綠客中論黃花

似我清如許賴有良朋共酒尊

鄴中懷古

碧草黃沙古鄴中當途遺蹟久成空  
莫年鼎足三分勢當日鷗張一世雄  
老去詩歌多霸氣中原人物入牢籠  
孔融歿後亡男子漳水東流憾不窮

銅爵臺

南飛烏爵北流淝遠上荒臺憶舊時  
百戰江山雄顧盼一家父子足追隨  
香消總帳美人老草偃春風清角悲  
過客可能存片瓦孽箋新製魏宮詞

武城道中

遠泛黃河千里查更畱蹤蹟滿天涯  
江村卯酒十餘盞豆



圃午炊三數家雨後桔槔閒古井秋來楊柳帶昏雅山川  
到處新相識記取遊人玩物華

蚤抵王家營渡河

晨光欲渡熾熹微水國秋深人未歸斷續荒雞曉野店冥  
蒙墜露溼征衣風寒渡口潮初落稻熟河濱蟹正肥底事  
艱難歎行路關山愁絕白雲飛

揚州懷古

江南鉛粉北燕支直到東都無盡期金帶幾逢開芍藥瓊  
花猶記滿罇釐千秋詞客鮑明遠一代風流杜牧之欲訪  
昔人遊賞處山堂水榭雨如絲

蠓磯靈澤夫人祠

崎嶇石徑鎖寒蕪。四壁殘陽照影孤。精衛幾年填碧海。女  
英終古望蒼梧。吳江楓落魂俱冷。蜀道鵑啼血已枯。香渺  
岷江通一綫。淚痕曾到永安無。

維揚雨泊次日將抵金陵

邗上羈愁廿四橋。滿城煙雨夢魂消。梅花嶺畔笳初落。春  
草宮中柳自彫。幾度朔風吹過客。雙飛蘭棹破寒潮。酒瓶  
詩社恩恩去。明日縈懷是六朝。

臺城懷古

江左偏安閨位終。臺城迤邐望無窮。西天貝葉書猶在。南  
國金華殿已空。牧夢遠牽鍾阜月。漁歌低度後湖風。遊人  
莫問蕭梁事。白馬青絲怨校童。

龔檢討大萬 三十一首

大萬字體六號荻浦武陵人乾隆辛卯進士改庶  
吉士授檢討充武英殿三通 國史館纂修典試  
廣西大考休致 純廟東巡 召試行在授中  
書補內閣典籍假歸不復出檢討少孤家貧力學  
矜尚氣節初充乙酉拔貢官永順訓導卽有盛名  
暨入翰林浮沈玉署二十年未展所蓄人咸惜之  
所著書多散佚僅存賜扇樓草再遊粵西草二卷

紀夢

有引

丁未八月廿八夜夢有人贈予以牙管素豪筆長頭銳  
頰其製迥異尋常謂予曰此白龍鬚也賦此紀其事

偶來漢陽作遊客使臣試院假三月堂額新題自白華知

是鍾陵舊時宅

原注鍾陵先生孫旆以宅輸官建試院

鍾陵文筆本朝雄名

堂流萬理未通

原注吳白華前輩推先生時文取少陵割不廢江河萬古流之義名其堂曰流萬

取萬古江河義兆我流寓名斯同人生去住良非偶一見

驚心定數有頽然自放開胸襟日題詩兼醅酒涼秋結

伴覽山川秉燭歸來夜半眠唧唧商聲猶在戶蘧蘧莊夢

便遊仙八月廿八夜初寐有客龐眉貌純粹欣然贈我筆

異常頭管修長約尺二管以牙琢比玉肪頭是銀豪勝霜

穗照人光彩生寒芒試穎剛柔總如意卻前鄭重還致辭

名白龍鬚君須記醒時指肘尙淩風訊之占夢云兆文章

瑞我聞鼠鬚有車寶千金不換蘭亭稿又聞麟角賜張華

博物當時盛女藻朝鮮使者我舊交狼豪貽贈稱佳好臨  
池三絕我一無敢向龍堂乞新造平生廊落杜陵人大筆  
爲予記夢因長歌鬱勃露光怪附會典故何鱗鱗文通秘  
授生花巧東野傍看香篆真伊嗟昌黎景純何敢擬茲事  
因由或有以先輩大名字宙垂故宅精靈猶在邇以白喻  
伯隱其辭然得吟鬢惠後起白華之論熊先生詩僅一二  
具杜理又謂古文非所長此論非公吾不喜穀貽堂集富  
遺文允配黃岡俎豆芬鸞鶴翔雲終落落蟬蚬撼樹徒紛  
紛雄風入夢亦足張吾軍

讀蔡呂橋進士三樹堂七古題後

我友銀臺錢南園談敵直欲窮河源文章盛推楚人後須

數西蜀人才繁我思此語非杜撰竊取其義縱橫言老莊  
屈宋誇接武相如子雲追高騫六朝蟬噪不足貴唐初子  
昂巍然尊同時李杜兩作者光燄萬丈扶桑漱蘇家父子  
橫宋代濂溪立說開南軒勝朝西涯雄館閣升庵振響撼  
頰冤國初掇科重制藝熊劉首出昭蒙屯靜林翰林出蜀  
產大科六十魁中原二千年來壇坫主楚蜀迭長稱雄藩  
豈乏海內鴻俊彥一似鼻祖先雲孫我交蜀賢頗云夥海  
山歿後蓮果存一紀前識蔡進士青城家世清華門翩然  
少年負俠氣長安歌館忘朝昏千金用盡蘇季子一石亦  
醉淳于棼爾來客遊江漢上心神契闊殊寒暄示我長句  
剛十首大筆莽莽波濤喧巴峽一瀉千萬里雲夢已足入

九吞十年不見何拓落一夕快讀傾瑤尊我慙拳曲不中  
墨君才干霄蔽日蟠仙根我詩錚錚同細響君如黃鐘大  
呂偕篪塤我是轅下駒局促君真迫風絕跡天馬奔吁嗟  
蜀人才凋今如此使我重刷舌本恣瀾翻會聞飯顆山前  
作詩苦至今齒冷青蓮魂文章盛衰關氣運亦助山水橫  
乾坤便欲移君高峯三十六置我武陵桃花源更欲倒傾  
瞿塘豔瀕三峽水滴滴手障歸湘沅再展胸臆狂騰掀與  
君騎鶴排天闥對樹旗幟塵鞭韃一掃塵世煙煤痕銀臺  
近司文事吾省垣馳兩人詩重評論

題周築東美人圖

花姨月姊紛靈怪禪定年來空色界何物珊瑚紙上來香

風自嶽幽蘭佩傳聞下嫁杜蘭香龍笛驚笙太渺茫耿耿  
星河人欲靜遲遲銅漏夜初長周郎顧曲翩然起赤壁燒  
兵灰未死大喬婉孌自春深冷落漳河一條水趙家輕瘦  
玉環肥骨肉停勻定洛妃薄命可憐留額暈消魂無那認  
腰圍平生俠氣驚虹電酒胃詩腸怯留戀傾國佳世上  
無三十年前眼曾見昨宵大雪正漫天團扇秋來久欲捐  
記取天寒翠袖薄好燒紅燭照清眠

衡山舟中曉望二首

長夜不成眠船窗小月明岸花醒酒氣人語落江聲作客  
經年慣閒愁鎮日生又逢佳節近惆悵故園情

遙望衡山郭參差傍水樓酒帘風一片帆影舫雙鉤嶽氣



通清漢江心劃碧流昔年軒蓋過未抵此扁舟

答人用衡山舟中韻

共作南天客耽憂古寺樓稻花連石磴榕影上簾鉤得句  
粵山遠懷人湘水流與君沽美酒同上木蘭舟

牛鼻灘口

明月隨歸雁清沅返客舟市鐙依岸近鄉語隔江稠問歲  
登禾後懷人落葉秋柴門欣在望風雨慰離愁

送瑞臺弟南旋

兩世無兄弟吾生幸與偕丁零從小辛苦慰情懷客路  
炎蒸重鄉心景物佳去開都繾綣別淚忍重揩

與汝初生後無錐五十年經營勞築室安樂始排田官况

清知味家風澹可憐宅傍多種樹早晚卜歸田

憩柏鄉雨花庵和壁間韻

千里南來道初逢水竹居野花依側壁雜樹繞前除風熟  
香生稻泉清隱見魚頻年困車馬對此憶樵漁

宿大榕江

水盤虛無裏船鐙歷落明幽潭沈野色空翠入新晴酒味  
豐年厚詩懷勝地清夜闌天籟寂山鳥喚催耕

和畢秋帆制軍登黃鶴樓原韻

仙客何年去碧蒼高樓莽蕩接曦光荊襄直控三巴國江  
漢爭趨百谷王萬戶曉煙孤岫白一川晴樹野雲黃登臨  
不盡千秋感鷗鷺洲前草自荒

許昌懷古

許昌大道引征鞍楚豫中間地勢蟠角赫星明漢人物竹林風遠晉衣冠黃初霸業悲荀彧白下才名憶謝安欲訪遺文費搜索西湖垂柳夕陽殘

宋時形勝潁昌城武穆軍威血染兵王氣未消江左賊神州虛擁汴京名梅花堂冷空文藻山水園荒長蔓菁莫向高原更南望朱塵羸馬不勝情

過固關

山勢如城上有城夜來刁柝寂無聲人從畫壁中間過月向銀河左界明日下琴尊還北顧風前裘馬自西征太平關塞恣遊覽未覺蠶叢有不平

哭瞿祠宗

前日逢君君浩歌年來情味類頭陀已知快事生前少漸  
覺良朋地下多中壽蓋棺非短命孤經魁榜亦巍科哭從  
齡六虞卿輩

原注只君金鑑字齡六陳君陞字虞卿

自許文章定不磨

彭肅子世丈過晤

三世高才楚甸尊

原注尊祖青原蒲楚南世父水南撫楚北從兄衣青師典試楚南北人材

多出狄公門文章親見翰林大

原注余以戊子出衣青師門

父老能言

僕射恩咫尺荒莊慙陸氏天涯芳草戀王孫鄉心孤子歌

聲近

原注時方築

風雨重陽黯別魂

揚州偶興

鶯花滿目管絃稠曾說淮南第一州驛路東南通日下風

帆畫夜枕湖頭金珠麗奪唐千佛裘馬心輕漢五侯夜市  
酒酣人影散不知春色在迷樓

郭外新城城外溪溪迴山與舊城齊千秋白骨連淮北一  
路紅橋出竹西楊柳春帆雜燕笑梅花孤塚杜鵑啼潮聲  
夜夜瓜州落儻有閒愁入繡幃

歷代興亡劫屢聞沙蟲猿鶴幾曾分玉鉤斜外楓林火紅  
袖圍中孽海雲烟餓偶憐文相國燒香誰兆畢將軍繁華  
轉眼都陳跡門看青山到日曛

自藤縣過平南舟中詠

江郭西迴一水長暮山秋淨野雲黃斜塘十里平蕪路叱  
犢聲聲似故鄉

丹竹墟邊水氣腥  
江船兒女鬧漁汀  
夜來野驛三更月  
猶照秋燈數點青

鎮日風輕不飽帆  
客舟如鷁尾相銜  
篙師莫遣衝波急  
臥看江頭燕子巖

自長沙一日抵沅江

瀟湘歷盡又沅湘  
一夜輕風送客航  
不爲子安能作賦  
有人歸去隱柴桑

書還石軒

有序

黔陽署東軒有石高八尺許  
蒼翠如筆格玉古色可愛  
詢知爲北郭邱氏  
布園中物爲前尹昇致者  
邱名士琳字玉璫明崇禎時貢生  
需次縣令園臨煙溪庵有金

粟寒山諸勝其仲子諸生式耜抗節 國初爲鎮帥械  
送武昌畢命時撰文自祭有以汨羅之水首陽之薇致  
祭於邱君之神云云今園亭之勝子孫尙世守之余曰  
官署猶傳舍園距城甚近公暇攜尊往眺奚爲不可慎  
亭同年賢尹也因卽還之遂以軒名還石亦佳話也  
浮屠奇石見來稀八尺青蔥玉一圍應剔蘚痕鐫七字汨  
羅江水首陽薇

幾歲移從月沛園便分碧血到東軒那知李相平泉路猶  
有行人感斷垣

舊尹辛勤計太癡銀螺寶鴨儘幽奇

自注園有銀螺  
寶鴨橋習家池

上山公蹟還石從君譜竹枝

和吳建軒同年 有引

都下好事者作燕蘭小譜吾友新化吳建軒思樹極菲  
薄之嘗爲詩有靡調忽開無故事一時囉嘖和巴人及  
箏阮無端催韶急不宜默點太平風之句作此和之  
心力空將百歲期春風滿眼綠楊絲縱然秋整工詞曲羸  
得西湖草樹悲

隔水芙蓉面面嬌國香誰許試輕描可堪剖分三分月卻  
對紅燈聽玉簫

九陌春花旖旎中瀟湘才子賦偏工要知麗則闕名教香  
草何妨續楚風

舟發沔陽



去去東門百里河仙桃南望水如螺沙隄萬綠垂垂柳隱  
映人家瓦屋多

羅詹事修源七首

修源字星來湘潭人湘潭有碧泉胡文定公故居  
也因以碧泉自號乾隆辛卯舉於鄉壬辰會試中  
式以母憂歸乙未補行殿試改庶吉士授編修  
由贊善一歲四遷至少詹事旋謫編修將擢侍讀  
學士有湘煙書屋詩鈔學士博學多通雅尚氣節  
詹廟在潛邸時陰識其人及卽位將大用而  
遽卒先生與先鉅野君爲鄉試同年詩集散佚其  
從子汝槐搜輯數首寄余且撰狀乞銘遲之久而

尙未得爲也老嬾荒廢慚負其有極耶

碧泉用南軒先生韻

淵流自清碧空谷有遙源言尋茲泉勝風日及妍喧書堂  
久岑寂靈蹟無復存巖氣何蒼莽沿洄道脉尊古人堂堂  
去遺跡餘邱園天光共雲影夏冷冬長溫顥顥于明珠瀉  
此水晶盆沙虛輝錦浪翠藻遍紛翻滌洗春秋筆大義炳  
乾坤嘉名余忝錫瞻眺欲無言

海棠

籠煙籠霧春陰薄淺暈微烘曉霞腳絳宮初返海天魂睡  
思重重透羅幃釵橫鬢亂總天姿嫣然一笑桃李時莫怪  
餘寒苦相勒待君看取未開枝

和朱滄湄比部井陘道中詩四首

存三

橫翠滹沱外盤空有絕陁萬重開蒼莽一線上青冥河北

風煙隔淮陰俎豆馨

原注井陘以西處處標韓侯遺跡

名山剛小別抗手

揖西屏

原注山名

匝匝羣峯裏孤城井底窺河身如蔓引嵐氣與秋宜石疊  
礧田出湍迴夜碓欹采風陶穴似行役本面岐

背水虛籌策將軍死地多重輕分楚漢盟誓自山河國士  
恩難報王孫憾不磨靈旗猶赤幟想像駐巖阿

莫韻亭百菊溪雨前輩法源寺看花不得同遊

百花是處倚東風咫尺城西怯欹紅天閣輕陰寒食後夢  
驚陳跡閉門中幾人好事游蹤接古寺尋春老眼同

星寶約之通參約之猶有幽期吾不負海棠香霧漸濛濛原注韻亭堅訂崇效寺看海棠

九月崇效寺登高因至法源寺

空庭落葉又成堆近郭招攜勝引來古寺夕陽偏有色寒香老圃未全開圖傳妙墨松聲寂原注崇效寺藏知朴上竹塢諸人青松紅杏圖有漁洋公題詠閣倚晴空雁影迴珍重大安殘碣在匆匆更與拂蒼苔

王學士坦修二首

坦修字正亭寧鄉人乾隆壬辰進士累官侍講學

士值上書房

古風

風塵任馳逐素衣化爲緇讒口肆譎張黑白焉得知促促  
轅下駒泛泛水中鳧笑梯與廉潔妍媸本自殊幡幡貝已  
成營營蠅易污誰與除邪佞先烹阿大夫

臭腐人所避而螳乃慕羶馳逐赴利場捷足且爭先桓發  
以博富曲叔以捫傳灑削與胃脯夫豈曰能賢環堵腐可  
褻容膝榻可穿歌聲出金石笑傲空林泉澹然無所營優  
游自樂天

石洛川養源 三首

養源字蒙泉湘潭人乾隆乙未進士授洛川縣知  
縣有惠政祀洛川名宦蒙泉爲天際先生壽霖曾  
孫少孤祖觀雍正中以人材保舉官固原知州罷

官後無所歸母與攜之依外氏親授小學毛詩迄  
於成立詩不多見僅存古今體三首

放歌一首贈余少佺丈

先生大筆驅今古光騰萬丈長虹吐潘張左陸無位置直  
欲把臂呼李杜才高不待金馬詔窮途每被路鬼侮五陵  
豪俠輕廣廈天高地厚無歸所酒酣擊碎處仲壺愁絕通  
破襪生鼓有時脫帽露頂發狂叫頓使千秋萬歲抑塞磊  
落之人淚如雨

花江坡

黔嶺高無極茲坡合斷魂崩湍摧地軸歆壁塞天門漱石  
晴仍雨穿雲曉亦昏四千五百級星漢手能捫

抵鎮遠

虎牙高挂雙峯月，雁齒平拖亂艇煙。  
水下五溪流漢沔，山通六詔鎖黔滇。  
總戎鼓角風雷壯，制使旌旗星斗懸。  
此是南荒門戶地，車書萬里共蠻天。

謝封川最淳

二首

最淳字東暘，號雲槎，益陽人。乾隆戊戌進士，官浙江西安、廣東封川知縣。有詩集，未見傳錄。其三台塢二律殆非其至也。

三台塢

有引

益治東水口舊有閣曰三台前，明崇禎戊寅秋邑宗伯羅文介公與中丞郭公些庵經始，重新賦詩，譙集極一

時盛逾四載辛巳圯於水旋兵燹燬無存荒沙白水垂  
百五十餘年矣乾隆甲辰冬邑諸君子慨然共謀興復  
易閣爲埕甫鳩工值歲祲輟越十有二年乙卯冬同志  
奮興請於大尹三山郭公誠吉舉工次第就緒將觀厥  
成焉爰卽宗伯中丞兩公經始倡和原韻不揣謏陋敬  
步後塵謬附二律

一迴閭闔彩雲奔北戶崇標斗宿尊

自注杜詩七星在北戶

風送騰

鸞銀漢路天通呼吸玉京門光搖鯢擊三千海氣壓翬飛  
十二崑協應泰階靈異闢登臨愜息典型存

金鼇聳戴百靈奔嗚吸風雲宰堦尊信有恩波添鳳沼好  
留大業仞龍門躋攀絕頂收全楚回討源頭溯遠崑平地



後先爭一簣江河不廢萬年存

羅敘授楚望 二首

楚望字望隆新化人乾隆庚子進士官永順府敘  
授敘授精於四子書文有羅文止之目亦喜爲詩  
無專集先友譚吾肩爲余言嘗見其北道諸作不  
減周建水諸君也今僅得一首

舟泊益陽得友人自京寄書

飄飄五兩水雲隈解纜江城酒一杯殘雨夜分人倦後微  
風天末雁飛來銅官渚上悲秋客金馬門前待詔才莫是  
長安居不易空教索米日摧頽

沅湘耆舊集卷第一百六終